

史記卷十六

秦楚之際月表第四

索隱 張晏曰：「時天下未定，參錯變易，不可以年記，故列其月。」今案：秦楚之際，擾攘僭篡，運數又促，故以月紀事名表也。

太史公讀秦楚之際，曰：初作難，發於陳涉；虐戾滅秦，自項氏；撥亂誅暴，平定海內，卒踐帝祚，成於漢家。五年之間，號令三嬗，**〔一〕**自生民以來，未始有受命若斯之亟**〔二〕**也。

〔一〕集解 音善。**索隱** 古「禪」字，音市戰反。三嬗，謂陳涉、項氏、漢高祖也。

〔二〕索隱 音己力反。亟訓急也。

昔虞、夏之興，積善累功數十年，德洽百姓，攝行政事，考之于天，**〔一〕**然後在位。湯、武之王，乃由契、后稷脩仁行義十餘世，不期而會孟津八百諸侯，

猶以爲未可，其後乃放弑。【二】秦起襄公，章於文、繆，獻、孝之後，稍以蠶食六國，百有餘載，至始皇乃能并冠帶之倫。以德若彼，【三】用力如此，【四】蓋一統若斯之難也。

【一】集解 韋昭曰：「謂舜受禪，在璇璣玉衡以齊七政。」

【二】索隱 後乃放殺。殺音弑，謂湯放桀，武王討紂也。

【三】索隱 即契、后稷及秦襄公、文公、穆公也。

【四】索隱 謂湯、武及始皇。

秦既稱帝，患兵革不休，以有諸侯也，於是無尺土之封，墮壞名城，銷鋒鏑，【一】鉏豪桀，維萬世【二】之安。然王跡之興，起於閭巷，合從討伐，軼於三代，鄉秦之禁，適足以資賢者【三】爲驅除難耳。故憤發其所爲天下雄，【四】安在無土不王？【五】此乃傳之所謂大聖乎？【六】豈非天哉，豈非天哉！非大聖孰能當此受命而帝者乎？

【一】集解 徐廣曰：「一作『鍤』。」索隱 鏑音的。注「鍤」字亦音的。案：秦銷鋒鏑，作金人十二，以弱天下之兵也。

【二】索隱 維訓度，謂計度令萬代安也。

【三】索隱 鄉秦之禁適足資賢者。鄉音向，許亮反。謂秦前時之禁兵及不封樹諸侯，適足以資後之賢者，即高帝也。言驅除患難耳「一」。

【四】索隱 指漢高祖。

【五】集解 白虎通曰：「聖人無土不王，使舜不遭堯，當如夫子老於闕里也。」

【六】索隱 言高祖起布衣，卒傳之天位，實所謂大聖。